



ル 5
1575
78



門名
1875
78

重修安徽通志卷二百三十七

人物志

孝友

徽州府

國朝唐道林績溪人順治初土賊竊發拘其兄道俊偪金道林直

入賊巢替其兄出遂死焉江南通志

程星煒休甯人父為山賊所執星煒時年十七詣賊痛哭求代

賊叱之去堅不忍捨遂俱死徽州府志

吳任度休甯人山寇入境被執拷索其祖以火炙腹用油髹燃

指終不言鄉勇逐賊退半日死休甯縣志

姚際謙休甯人嘗遇暴橫挺身就縶以舒父伯之難兄病篤割

股療之從兄以捍賊遇害於兵火中覓其骸骨斂之休甯縣志

重修安徽通志卷二百三十七 人物志 孝友 徽州府



吳敬義字德州歙縣人幼避寇父子相失長事祖母及母喪葬畢告墓尋父徒步萬餘里遇族人始知父歿求窆所不得慟欲身殉為族人強止乃招魂歸葬終身服素未嘗宴笑歙縣志新增
汪道祥休甯人山寇突至母柩在堂不忍去賊執之詰曰何為不避告以願死不願離母柩側賊稱孝子而去休甯縣志
吳連休甯廩生母病割股以進山寇至聞有掘墓者奔護親墓遇賊持刃問故以情告賊感而釋之休甯縣志
朱道聖休甯人祖母卒廬墓有異鳥翔集海賊擾京口兄在危城中馳往則城已陷冒白刃尋之以歸休甯縣志
王起生婺源人父龍光為義勇殺賊起生年少匿叢中見父瀕危躍出助戰追刃數人死於陣婺源縣志
王士傑婺源人順治初山寇至父信盛率鄉勇捍禦瀕危僕拚

死救免後閩寇劫其兄傑冒刃求代旋以計脫備兄歸婺源縣志
鄭可祀婺源人年未冠閩寇至衛父母匿山谷遇賊顧父母悲號賊感而釋之兄弟同居無間婺源縣志
汪鳴驚婺源增生隨父金陵試歸舟覆已扳舵出見父沒復躍入江越七日抱父屍浮出至今土人名其地曰孝子港婺源縣志
汪翼光婺源人寇繫其父時年十三號泣請代賊感而釋之婺源縣志
程世鐸歙縣人父賈於滇遭吳逆變絕音耗鐸告廟出尋五年遇於烏蒙奉歸盡養雍正三年

旌表建坊江南通志

徐應梯休甯人父遠遊流寇亂絕音問者二十年母命之婚曰兒父何在豈婚時乎即裹糧尋父足跡半天下至楚偶倦臥夢

人呼之起曰爾父來亟前行遇一老叟詢其里居即父也即日

迎歸休甯縣志

汪興麟婺源人母為閩寇掠去徒步往尋不得乃學謳攜鼓拍沿門歌唱與句為侶踪跡至泉州其母遂踈出汲得相遇急負以逃乞食而歸婺源縣志

張雲鵬績溪人閩賊入城居民駭散父病雲鵬畱侍不肯避賊義之兄弟友愛撫姪如子同邑胡爾英寇至以父病不肯避賊偵知之不入其室績溪縣志

胡連瑞黟縣人宋乞之亂將殺其父連瑞奔入號泣請代賊感其誠委刃而去父疾衣不解帶孝事繼母讓產推財友愛其兄黟縣志

張正茂歙縣人父老病躬滌矢溲親調餽餌十餘年不懈嘗買

婢詢知其父無他子即還之江南通志

程志濬歙縣人幼弟隨父客蜀相繼歿濬千里奔赴值寇亂即蜀治喪廬居三載路稍通扶兩櫬歸從兄志澤流落四川訪得迎歸志澤歿撫其幼孤二十餘年徽州府志

趙時腴休甯諸生父死真州徒跣扶櫬歸廬墓側析產推多取少又傾囊脫弟奇禍嘗避寇松蘿山賊至走峻阪而墜有大樹承兩股若跌坐然賊驚異之而去徽州府志

楊國銓黟縣人早喪母事繼母如所生父母繼歿廬墓三年同邑舒拱薇父卒即葬三年不離墓所徽州府志

鮑逢昌歙縣人明季父外出無耗順治三年逢昌年十四乞食尋訪相逢於雁門奉以歸母病走桐廬攀懸崖得乳香以調藥而愈乾隆三十九年

旌表建坊

歙縣志

胡茂楠歙縣人明季父賈於閩粵無音耗茂楠往尋徧歷兩省至南安遇一老嫗詢其里居家世告以其父埋骨之所齧指滴血以驗置槨負骸歸

歙縣志

方如珽歙縣人祖以賈潛山卒明季兵亂櫬不得歸如珽志欲往尋其姑少自潛山歸嫁年已七十願同往乃至潛山已迷葬所或言亂後枯骨為僧所瘞或云某洞有數敞棺復偕姑入洞於髮鬢亂髮撥出一髻簪姑大慟曰是矣此簪斂時我年十四為簪之者乃重市棺衾斂而歸葬

歙縣志

王懋璋歙縣人年十四父歿於交阯即子身往尋至其地號泣三年交人憐之始告以所在然國有厲禁棺不得出懋璋以計給守關者得越境歸

歙縣志

胡師謨歙縣人祖客死淮隻身孤往徧歷荒陬逢老嫗指點得負骸歸同邑江濯龍年未弱冠至江右負其叔父骸歸與從弟數世同居歲饑族有逋賦獨捐金為之代償

歙縣志

曹美謹歙縣人母孕時父出遠遊美謹年十四即辭母出尋至河間府避雨茅檐下有訓蒙老人招入詢問即其父也相向而哭河間人醵金贈歸

歙縣志

鮑得成歙縣人父客死徒步數千里扶櫬歸終身無笑容事母不離左右親滌厠脮病則衣不解帶又嘗繼父志置田贍其族人

歙縣志

仰文炤歙縣人父賈於楚值三藩肆逆無音耗文炤徒跣出尋歷滇黔閩粵乃遇於貴州玉屏縣奉以歸文炤歿厝於淺土遇大水棺漂流其子際球沿流尋覓凡數月始得於錢塘之澣買

舟載歸歙縣志

汪士奎歙縣人年十五隨父至浙盜夜入室將刃其父亟以身蔽被重創父得脫而士奎死歙縣志

倪宗華祁門人康熙閒浮梁賊犯祁父被執宗華往救被殺列女

節孝倪宗華妻 陳氏注 新增

吳尙滋歙縣人遭亂兄弟散失裹糧尋訪數年乃得兄於蕪湖得弟於廬州迎歸以己田宅均之歙縣志

許毓僕歙縣人年已六十母病猶割股以進甲寅寇亂毓僕在豫章官軍剿寇所獲婦女皆為解囊贖還其家歙縣志

廖朝宗祁門廩生父病割股以進弟服賈負債朝宗賣己業代償之祁門縣志 新增

胡洪波字龍躍祁門人有孝行父任壽州學正洪波留家事母

聞父訃嘔血死祁門縣志 新增

鄭朋錫歙縣人聞寇陷邑時奉母避深谷還家取糧適遇寇將開其父棺朋錫伏棺哀號願以身受刃賊感而引去歙縣志

胡有慶祁門人父卒廬墓三年徽州府志

江慶角婺源人親歿廬墓三年哀感行路徽州府志

洪清歙縣人父遠賈病歿時年十三聞訃走千里扶柩歸一夕夢父促之行亟啟戶出門無幾而邸舍為盜所焚矣既葬廬墓三年母卒亦如之徽州府志

汪廷芳婺源人年十六過山林有鹿遇獵掩而放之明年隨父入山稍後鹿啣其衣隨之行見父為虎偪仆於巖直前負之逃

虎熟視掉尾去婺源縣志

程六德休甯人幼聞塾師說孟宗王哀事輒流涕母病禱天求

代及卒水漿不入口以毀卒江南通志

程正祥休甯人七歲生母卒哀毀若成人父病疝甚須苟末調酒服山居去市遠祥深夜持炬往路拾紙裹中皆苟也持歸以進得愈人以爲孝感後父卒未葬劫賊焚山祥伏父棺哀號風反火熄賊感歎去雍正二年

旌表建坊休甯縣志

楊志隆休甯人十歲母病數月不解衣帶及卒哀毀隨父客高涓父被土寇所擒偪金將加刃志隆哀泣請代賊憐而兩釋之雍正二年

旌表建坊休甯縣志

楊輝祖休甯人父立正知宜山縣病甚籲天求代父病得瘳宜山屢被猺害父奉命捍禦輝祖挺身入其洞擒其渠魁境賴以

安以積勞成疾卒雍正三年

旌表建坊休甯縣志

汪龍欵縣人祖客死於蘇父往迎柩復溺於水龍時方六歲及長出覓祖父棺晝夜號泣感神告得之隨扶兩櫬歸葬雍正三年

旌表建坊江南通志

楊嗣勃休甯人性至孝父疾晝夜不離側從兄爲山賊所擄微服奔壘獻貲求釋賊感之遂得同歸雍正五年

旌表建坊江南通志

孫鳳翽休甯人少孤力耕負販事祖父母及母甘旨無缺母哭夫失明每晨長跪以舌舐之逾年復明雍正七年

旌表建坊江南通志

趙斐休甯人八歲待父疾人稱孝童康熙甲寅避寇榔源潛出
為父母求食屢攫賊鋒幸免母疾斐夜禱北辰忽燭光竟天踰
時始散兄弟同居數十年無私財雍正八年

旌表建坊

江南通志
休甯縣志

金慶治休甯人少時遊學江甯父卒奔喪撫棺一慟幾絕遂誓
不出遊奉事老母母得末疾不解帶者數載母卒哀毀未幾遂
卒雍正八年

旌表建坊

江南通志
休甯縣志

汪應乾休甯人三歲喪母稍長展墓悲不自勝繼母病臥應乾
時年十一侍湯藥躬浣滌者踰年不懈父卒哀毀三年不入內
室雍正十年

旌表建坊

休甯縣志

朱元儼休甯人父病籲天求代母患疽以舌舐之得愈親歿廬
墓歸未一月而卒雍正十三年

旌表建坊

江南通志

俞尚賢婺源人母病刲股進得愈父病又刲股進亦得愈及父
母卒廬墓七年同邑王景裕父病禱天刲股及卒廬墓三年又
俞繼龍胡璋戴貞昶程榮嵩戴文輔戴聖明吳尚忍胡廷梁余
端程兆先余德旺張曰玫金鳳翔詹昂元汪國賢方仲戴之麟
汪元康王光魯王士煌吳邦慶汪元堯程廷孝江光綜施如俊
汪德乾金怡方功宏汪富閻方德侃張廷悅戴有權皆以刲股

療親聞

婺源縣志

汪元毓婺源人聞寇入里囚元毓勒其父輸金毓呼天大哭賊
營忽火得免父病刲股得愈道拾遺金守而還之

婺源縣志

游份儒婺源諸生父為賊得挺身求代賊感而釋之婺源縣志

查兆光婺源人賊掠其里兆光已潛避既而聞弟被執不勝榜

笞奮然回救與賊鬪而死婺源縣志

方日治婺源人隨父入山父為虎攫日治奮力擊虎奪父爪牙

中而走虎尾其後遇救俱免婺源縣志

施世學婺源人性孝友二親及兄弟染癘將危世學左右服侍

三月不怠皆得瘳而亦不染子悅快割股療母疾孫報養祖父

世學病報亦割股療之時有孝行傳家之譽婺源縣志

余元珍婺源人父遊學荊州遇寇亂陷賊元珍兄弟俱欲往尋

其母不許元珍號泣不絕有義僕胡興祿遂與之出鋒鏑中半

載竟得以歸婺源縣志

洪文明婺源人母病割股進得愈嘗與姪世榮拾遺金於道守

而還之婺源縣志

呂文旦婺源人父疾割左股進得愈繼母疾又割右股進亦得

愈甲寅閩寇擾亂冒險出請

大兵剿寇里獲安堵汪村民櫻主帥怒文旦力解得釋保全無算

婺源縣志

胡起蛟婺源人四世同居父疾禱神割股得愈同邑王煥文爓

文五世同居食指盈千庭內藹如婺源縣志

吳汝正歙縣人母病糜股以進病益劇計無復之乃懷刃籲天

割左脇肝一片暈絕而甦亟命妻煎之以進得愈同邑王之卿

亦以割肝活其母徽州府志歙縣志

張三愛歙縣人自河南徙母病連年不愈乃剖胸割肝以進得

愈由是長齋不娶同邑鄭嘉瑄母病聞三愛以割肝效遂詣城

隍神割肝進母亦得愈

徽州府志 歙縣志

項繼成歙縣人年十四割股療繼母疾眾欲請旌泣謝曰此非

為名且不欲令母知之也

江南通志

吳蔚歙縣諸生父病割股終身不使人知後以讀書攻苦致疾

妻潘氏亦割股進竟不愈而卒

歙縣志

鄭肇輅祁門人父病篤願代一日以羹進父甘之漸愈後

暑月人見其痕痕始知其割股

祁門縣志

謝廷薦祁門人母病其妻李氏先割股進家人弗知也須臾廷

薦以湯進頃之廷薦之兄廷升又以羹進視之皆肉糜也共相

驚訝母病遂愈

徽州府志

汪應鳴休甯人母病篤焚券千餘金以禱讓遺產於二姪而賃

舍以居者四十年教八子以義方後康熙丙辰患重證第三子

顛割左股進得愈癸亥復病第六子晨割左右兩股進得愈甲

子又病灑割右股進不效晨乃復割左右股進得愈晨創甚第

七子日昃衣不解帶侍之數月割臂進兄不效第八子日昇又

截中指和藥啖之晨終不治眾皆傷之

休甯縣志

詹家琦休甯人母病同妻黃氏先後割股進得愈先是父病其

姊接弟割股進得愈接弟竟以創卒後家琦夫妻歿人見創癍

始知之

休甯縣志

黃九經休甯人年十六割股療母不效感傷成疾未幾而卒同

邑方士璜兩次割股療母增生吳秉鍾割股以療繼母又潘文

默劉元憲吳德榮程聯徽皆以割股救親聞又諸生吳世楫父

病割股及卒廬墓

休甯縣志

黃燦休甯附貢父病割股以進嘗攜幼弟山行遇虎以身翼弟

虎熟視之而去

休甯縣志

朱之光黟縣人隨父客六合父病熱狂夜溺於井之光亟躍入

拯之出割股以進遂愈

黟縣志

程首登黟縣歲貢親歿廬墓三年後病篤其子見日割股療之

徽州府志

舒啟標黟縣人母病割雙股療之及卒哭泣三年未嘗見齒同

邑楊榮卿楊懷泉朱永曦余聯振程宗旦史國禎史朝安舒啟

震舒夢龍許選葉凌雲葉榮濟黃琳皆以割股救親聞

徽州府志

汪琦黟縣庠生父病嘗糞割股及歿琦以哀毀卒同邑汪世顯

割股療母不效亦以毀卒

黟縣志

汪鉞黟縣人年十四割股愈母病及年四十七復割股愈父疾

同邑庠生朱功懋嘗割股療母疾

黟縣志

吳嘉會黟縣人其祖德宜官光祿署丞卒於都父方櫻疾嘉會

子身入都扶襯歸葬父疾割股以進及卒哀毀念從弟二人久

客無踪父疾因之而起服除後周行數省尋之歸讓產授室

黟縣志

方瑞合績溪人父病割股兩次繼母疾又割股撫姪如子弟有

急難救之七日不就枕平居恤孤寡助嫁娶捐資全人夫婦義

行甚多

績溪縣志

胡如潢績溪諸生兩次割股療親疾與弟同爨數十年歲歉捐

賑代償官逋同邑馮世芳胡良知汪夢熊馮可守胡光倫胡文

顯馮世標馮泰宗洪茂盛汪仲誠汪啟遠陳有昊張國善汪時

修周啟樹胡允溥章承星汪光杰庠生汪煜皆以親疾割股聞

績溪縣志

洪廷素祁門人兄廷廣遭奇冤將入獄廷素自豫章歸不入門
即赴公庭自代後幸以事白釋祁門縣志

汪燧祁門人母患乳癰醫治不效燧以口吮之而痊祁門縣志

汪銘璜歙縣人生數月傳聞父死於淮母陳氏遂自經育於祖
母許氏許病割股進得愈後聞父在走千里奉歸子澣亦割股
療母病澣之子琳幼時與姊同割股以療母病姊後適葉氏復
割股療其夫遂以創卒歙縣志

鮑鍾謙歙縣人割股療母子繼孝亦割股療鍾謙病其妹桂如
隨其夫僑居溧陽聞鍾謙病割股和藥送至姊宮如與弟繼志
皆割股以療母歙縣志

汪嘉歙縣諸生割股療母父病又割右臂時弟諸生泰毅不謀
於兄嘉妻黃氏不告於夫各割股進父遂愈同邑程士璿備於

膠州聞母病割股為丸寄家命妻凌氏潛進而凌已先割股和
糜以進姑矣母病遂愈凌在室時蓋嘗割股以療其母者歙縣志

金長洪歙縣人嘗割股以療其母子標亦割股以療母同邑張
慶曾項敬丙吳子灝許以誠曹獻瑞皆以割股療親聞又汪逢
源先割股以療兄後割股以療母其子國棟亦割股以療父葉

一鈴割股療母其子永禮亦割股療父項兆鑲割股以療伯父
吳立朝割股以療祖父吳厚力吳宗孔皆割股以療祖母歙縣志
羅熊歙縣人與其弟祥俱割股救親祥以不效復裂左脇取肝
親愈而創亦無恙歙縣志

宋錦汪天錦鄭之生葉啟佳吳焜江山永皆歙縣人並在童年
割股以救親同邑吳祚貞宋在相兩次割股以救親程大順前
後割股以愈二親又徐璋玉謝如標阮經灝羅鑽汪家權黃居

先胡士講汪長明汪玉龍黃恆程國柱洪如璋羅元祖汪可越
鄭崑賀銘東畢滋大項大德程斯覺程應進汪士道曹毅巴維
錫宋在仕葉志仁洪廷憲鮑逢昌鮑起龍畢法龍鮑昌楊廷樾
黃士能方文業鮑浩源鮑李壽王秉和程之標羅世靖汪大海
鮑嘉賓江如璉皆以割股救親聞

歙縣志

江大瑾歙縣人年十四母病衣不解帶割股和藥以進及卒廬
墓同邑胡汝端割股療父及卒廬墓三載又洪德常繼母喪廬
墓姚啟語樵薪者父歿廬墓終身又許朝遴張澐許堽齡鄭錫
汝皆以親歿廬墓聞又程其祿居母喪廬墓土室衣衾被竊夜
臥荒草中風雪橫侵蛇驚盜縛數鄰於死不改其心凡十有四
年卒於墓所

歙縣志

章泰啟績溪人與弟泰岱泰定皆割股療母其母汪固嘗割股

療姑疾者孝母生孝子也

績溪縣志

汪若金績溪庠生父病割股進得愈母病偕妻割股進亦得愈
同邑陳鉉興割股以愈母疾子文永亦割股愈鉉興疾又廩生
唐大成割股療父又割股療母曹均可割股療母

績溪縣志

胡颯績溪庠生母病割股療之與兄析居推金讓兄嘗捐重資
修路又修白里青虹二橋同邑周春亮割股療父建義冢茶亭
施棺焚券義行甚多又章瑞熹父病再割股兄弟同居無閒郵

族焚券義不勝舉

績溪縣志

王士玉績溪人割肝愈祖母疾

績溪縣志

胡光敕績溪人兄光整光敏早歿父病光敕割股母病光整妻
曹光敏妻王皆割股王病子大儒割股曹病媳曹割股光敕病
子大連割股一門之內孝行相仍

績溪縣志

洪文功績溪人負薪養親父病刲股及歿廬墓哀泣披草露宿

虎為遠避績溪縣志

汪文求績溪人五歲喪父事母至孝母病臥榻下不解帶者兩年及卒廬墓異蛇盤於廬側不為動三年後歸遇忌日悲哀終其身績溪縣志

吳汝琨祁門諸生母病不解帶三年其弟汝珽割股療父疾汝琨嘗拾遺金二百兩告官貯庫後失金者至為白官還之汝琨客鳩茲捐金成浮橋姪儀法童時割股以愈母疾徽州府志祁門縣志

汪起謚歙縣人仲兄以朋黨牽連在獄起謚隨侍凡七年舉京兆鄉試兄死扶柩歸不復進取歙縣志

王基嘉歙縣人父採薪為虎所攫基嘉持彎刀逐虎從虎口中奪父歸須臾虎復來攫基嘉復與之奪虎釋其父而傷基嘉遂

死徽州通志

汪之縉婺源人負薪養親父病疫縉與妻陶氏禱天割股進得愈未幾母疾縉復割股以愈之婺源縣志

汪國勳婺源人祖母朱疾刲股療之得愈朱蓋嘗刲股療其姑者婺源縣志

吳金芝婺源人父疾刲股療之母病渴臘月思梨不可得忽遇一道士贈以二梨人以為孝感婺源縣志

汪嘉賜婺源人年十三母疾刲股療之兄患疽求醫數百里外冒大風雨入深山為采藥婺源縣志

戴寄婺源人年十四刲左股療母疾父病又刲右股療之家不戒於火寄適在外衝火入負母久不出人疑其死火熄聞井中呼聲乃寄與母也婺源縣志

董起庠婺源人親疾刲股及卒廬墓三年婺源縣志

胡慶珪婺源人嘗割股以療母疾子天源孫有權皆割股療親

同邑俞文成父疾再割股以療得愈程敦本母疾再割股以療

得愈又施用悅詹應焜皆以割股救親聞婺源縣志

張五綸婺源人繼母病篤割股祈禱得愈及卒廬墓又孝童董

昌真戴逢洽董錚皆割股救親而詹茂誠養子光裕割股療母

尤為難得婺源縣志

潘光烈婺源人其父自鄰村回山水暴漲失足墮水光烈聞之

沿溪奔救中流見父浮沈遂躍赴水越日見其屍猶手抱父不

釋婺源縣志

汪元耿婺源人館於外閭里中不戒於火急馳歸正爇及其屋

冒烟負母出復入取父遺像鬚眉皆毀兄傭工泰興而歿往返

三千餘里負遺骸以歸婺源縣志

戴為穀休甯人家於吳興嘗與兄泛舟菱湖舟覆漁者援之呼

曰先救吾兄兄起而為穀漂泊淺渚得全休甯縣志

汪源澍歙縣人父病日至呂祖祠禱神求代凡七日不食一夕

夢髻而黃冠者語之曰汝父生矣父果愈源澍隨櫻疾死之日

惟曰父生吾含笑地下矣歙縣志

王鴻嶷婺源庠生父患膈醫云雁血可療一日夜走數百里得

活雁以歸及卒哀毀廬墓三年同邑增生潘鍾齊庠生汪昉諸

生王光祖又程起相程文炎施世提潘世鈞查昭玉黃大富金

時烘李秉紋皆以廬墓三年聞婺源縣志

方時熙婺源人嫡母歿廬墓三載猛虎毒蛇皆不為害廬旁涸

泉忽溢以供烹汲今稱孝子泉婺源縣志

金肇基休甯人三歲時母為捉蝨白母曰兒喫母乳無異蝨喫

江南通志

兒血遂自斷乳親歿廬墓三年山故多虎自是遠跡

余宗澐休甯人幼失怙事母孝母卒廬墓蛇虎遠跡以哀毀甚

休甯縣志

卒於廬同邑黃興教親沒廬墓三年亦以哀毀卒

張本休甯諸生性孝友業賈所得供父母外悉均諸兄弟不自私父母繼歿廬墓四年

休甯縣志

王士汲歙縣人康熙戊午隨父往四川販木中途遇盜將殺其

父士汲哀泣求代盜釋之曰看汝年輕竟能知孝奉父歸以重

驚致病卒

歙縣志

許龍歙縣人家貧同弟樵采以供母弟為虎所攫盡力搏虎奪

屍負之且拒且走得脫

歙縣志

許公珩歙縣人從父舟行父失足墜水倉皇躍入拯之父出水

而公珩力竭死

歙縣志

許起鵬歙縣人常負米江淮閒刻期歸侍適往江右聞母有病

兼程馳回而母已歿遂一慟而絕

歙縣志

王圻黟縣增生父疾坐臥不離側欣戚必視父顏及歿哀毀柴

立五舉優一舉孝廉方正為時所重

黟縣志

汪浩歙縣人嘗往漢口父病亟歸舟至中流風大作浩痛不見

父仰天一號風止得達岸視檣已橫裂矣同邑曹士國九歲時

父客死池州即往迎柩方出口風浪大作檣傾舵折士國撫棺

一慟舟如箭發瞬息達岸舉舟相慶曰非孝子在葬魚腹矣後

母歿士國年已七十猶作孺子泣

歙縣志

汪元倫歙縣人兄元福為舟人所害訪之三年得其姓名告官

搜捕猶有元福行李帳記冤始得伸而元倫亦瘁而死元福子

時爵扶其柩歸

歙縣志

張日光績溪人父病衣不解帶者五年母卒廬墓三年不茹葷

酒同邑程瑜父得痺疾服勤六年及卒廬墓三年又諸生曹雅

範亦以親歿廬墓聞

績溪縣志

何嘉騰黟縣人母病篤刲股以療及卒廬墓三年既歸仍刻像

事之同邑歲貢葉其荃親歿廬墓三年又吳伯貞李兆舉皆以

親歿廬墓聞

黟縣志

方振聲黟縣貢生事母極孝母程氏壽百有二歲為

聖朝人瑞建貞壽坊西武嶺上

黟縣志

余海山黟縣人於休甯編竹為業母卒葬於休廬墓盡禮乾隆

戊申大水漂棺捐資埋骨無數同邑余世光父死廣東奔赴扶

輓歸廬於墓側

黟縣志

汪楚麟休甯人幼時父遠出常以不得見為恨後知客死雲夢

裏糧行數千里尋見後母及弟扶父棺而還過楚江遇風舟幾

覆同舟十餘人夜夢神語曰汝輩當厄賴汪孝子以免覺而言

皆令

休甯縣志

吳宏祥休甯人父遠貿無耗母病刲股者再得愈每欲尋父母

以無他兄弟輒不許及母卒決計往尋經歷險阻十餘年卒奉

父以歸

休甯縣志

吳鵬休甯人父貿易妻東病卒友為葬之鵬時甫六齡即知哀

念比長母代謀婚娶鵬泣請尋父歸然後授室比至婁東父友

零落杳不得耗以母病馳歸踰年再往晨夕泣尋目幾瞽夜夢

父曰欲得吾棺惟王姓者知之乃徧行荒野遇王姓即問終不

得一日遇虎為獵者所救問之王姓也泣以情告乃即當日父

友所僱舁棺者也遂得柩歸休甯縣志

吳先民休甯人父遊不歸先民年十五卽子身往尋歷數省出

塞而北乃得父奉歸無何父仍出卒於外先民復徒跣往負父

骨歸休甯縣志

詹文錫婺源人父遠遊不歸文錫年十七誓欲尋親歷楚蜀至

滇不得哀號震天夢神告以當速往貴州乃走百里附商船兀

坐長吁商疑問以情告商曰汝吾子也相持哭乃偕眷屬俱歸

後積資頗裕承父命至蜀重慶界涪合處有險道曰驚夢灘捐

數千金鑿山開之舟陸皆便當事嘉其行為勒石曰詹商嶺婺源縣志

仰良枚歙縣人幼孤奉母至孝乾隆乙卯舉家病疫枚偕妻汪

氏禱神願以身代母旬日汪暴卒枚亦不復娶歙縣志

張玉鑑歙縣人康熙四十三年刲股療祖母疾張祚壽雍正十

一年刲股療伯父母張立松乾隆四十七年刲股療本生父俱

愈歙縣志

金長洪字師林歙縣人嘗割臂肉以療母疾弟病走百里外求

醫足爲之繭壯年喪妻終身不復娶徽州知府舉爲鄉飲大賓

傳劉大櫨撰

鮑光朗歙縣人三歲失怙事母孝每出遊必詣父墓泣告而去

母歿終身不見笑容乾隆二年

旌表建坊鮑增光朗子也孝如其父父歿廬墓三年母歿既葬哀毀而

卒乾隆十四年

旌表建坊歙縣志

倪廷松黟縣貢生隨父寓常州父病衣不解帶及卒扶柩歸葬

重修安徽通志

卷三百三十七 人物志 孝友

徽州府

廬墓三年事母孝撫庶弟成立乾隆三年

旌表建坊 黟縣志

朱麗新休甯人常隨父寓道院山寇竊發麗新為賊所擊以衛父不顧父卒終身不御酒肉乾隆三年

旌表建坊 休甯縣志

金啟輝休甯人早失怙母病噎跬步不離及卒哀毀廬墓三年乾隆八年

旌表建坊 休甯縣志

金正顯休甯人父僑居金陵顯甫九齡父卒哀毀如成人母思欲歸葬而力不逮乃拮据扶父柩歸夜停露處匍匐其旁不入旅店寢宿乾隆十年

旌表建坊 休甯縣志

方輔休甯附生父病痢夜數十起輔衣不解帶者兩月及卒哀毀骨立父愛吳山水謂死必葬焉乃遵遺命奉母柩合葬吳蒸山廬墓三年乾隆十六年

旌表建坊 休甯縣志

章遠績溪歲貢母喪哀毀父卒三年衰經不去身終身不御酒肉事伯兄如父仲染疫奉侍不離仲卒撫其二子成立選甘泉訓導未任卒乾隆二十五年

旌表建坊 績溪縣志

周雲驊績溪人父歿廬墓兄促之歸不從嘗獲竊者贈金遣之其人感激改行乾隆二十五年

旌表建坊 績溪縣志

胡挺績溪諸生父祖繼歿廬墓三年不忍去母病籲天求代得

重修安徽通志

卷三百三十一

人物志

孝友

表

徽州府

愈平居振興文社修路施藥歲凶平糶義行甚多乾隆二十五年

旌表建坊

績溪縣志

汪學順婺源人母病瞽朝夕吮舐復明及卒未殯鄰火延及抱
柩哀號風反火息既葬廬墓虎嘯鬼啼不為動兄卒撫姪成立
拾遺金守而還之乾隆二十七年

旌表建坊

婺源縣志

吳曰連休甯人年十三父客楚音問不通祖老且貧樵採以養
及卒廬墓楚有夏逆之亂繭足千里冒險尋父遇賊受傷泣以
情告賊義而釋之得遇父奉以歸父卒治喪廬墓如祖時乾隆
二十七年

旌表建坊

休甯縣志

王鴻岸婺源人幼出嗣生父病目求免糞星夜入山得藥歸父
目得痊母病劇禱天求代母愈而鴻岸卒乾隆三十七年

旌表建坊

婺源縣志

許永科婺源庠生父病嘗糞以卜吉凶母病衣不解帶者四旬
得痊父母繼歿廬墓六年乾隆三十七年

旌表建坊

婺源縣志

汪士銓休甯人生時父貿易潛山財被劫不得歸士銓十齡未
見父稍長請母往尋得迎歸父病疫顛天求代額如墳起父得
愈乾隆三十八年

旌表建坊

休甯縣志

胡紳黟縣附貢父光祖好義紳每先意力成之母患瞽晨夕祝
天以舌舐之兩月復明乾隆四十一年

旌表建坊

黟縣志

施用烜發源人父病嘗糞以下母病篤晝夜撫摩廁牖之役皆躬親之父母繼歿水漿不入口者數日既葬廬墓哀感行路乾隆四十九年

旌表建坊

婺源縣志

汪肇正休甯諸生家貧遠出祖病危倉皇馳歸越險避賊僅以身免父兩遭病晝夜露禱額破血流得愈方父病時室延鄰火冒烟負父扶母以出仰天一號風止火息父卒廬墓三年乾隆五十二年

旌表建坊

休甯縣志

胡洋休甯人父客外時年僅九齡事祖委曲承歡以代父職聞父病千里迎歸盡誠侍疾父歿欲以身殉母曰如我何乃銜哀

終養撫孤姪如己子門無閒言乾隆閒

旌表建坊

休甯縣志

章逢詔績溪人隨舅氏客於宣忽心動晝夜馳歸母適患疽顛天祈禱旋得異授靈膏而愈親喪哀毀鄰里感泣友愛昆弟拯貧郵族歲歛雖力不足必多方輸金以助賑乾隆五十八年

旌表建坊

績溪縣志

程肇光休甯人母卒哀慟嘔血出質松江聞父病歲暮風雪舟楫不通千里徒步歸季弟生數歲失母命妻養之長分己產與之松江及本郡歲歛皆捐金以賑全活甚眾卒祀鄉賢

休甯縣志

汪樸休甯人父失明舌舐三年遂得復

休甯縣志

汪文時休甯人少失怙傭工西江忽心動一夜走二百餘里歸母適病疽以口吮之得愈

休甯縣志

孝友

徽州府

程文瓚婺源人冬日母病思食鮮鱸往釣忽得巨魚父患痔癰以口吹藥親污穢四十餘日得愈婺源縣志

胡清燾績溪增生父廷璣兄弟六人同居稱孝友之門燾率而行之取常棣之義建直然堂合昆弟子姪講習其中輯孝思錄以訓迪後人一門皆遵其教績溪縣志

王士武婺源人母失明與妻程朝夕吮舐七載得復同邑呂維球鬻薪養母三十年不懈母病目以舌舐之得愈又諸生張錦屏亦舐母目得明婺源縣志

洪夢蘭婺源人母病禱天求代得愈父患前閉從醫言跪而吮其陰數十日得痊同邑王廷亨父病發背以舌吮其積癩而痊婺源縣志

程昌貢婺源諸生母患疽以口吮毒而愈婺源縣志

余文熾黟縣人父老病腸瘡出吮之而愈黟縣志

金宗曜黟縣貢生父目瞽舐之而明母病癰吮之亦愈同邑傅有通父患疽吮之立愈母得風疾撻有通往往流血而不離左

右黟縣志

周廣涵績溪貢生父病目醫不效以舌舐之日數次頓愈績溪縣志

葉仕年休甯人四齡喪父朔望必衣冠禮諸昆曰吾不得事親事兄所以事親也兄鵬年病危割股以療弟壽年早卒一念及

輒奔至墓所哀泣庭前有紫薇樹忽生連理枝焉休甯縣志

汪瓊生休甯人父久出肩販四方尋之遇於池州大通鎮因賃居焉父病割股以進及卒權厝空地日出市販夜宿柩旁鎮人為之感動休甯縣志

汪雲休甯庠生母病割股療之得愈同邑汪士鸞母病割股者

再得愈又程鐸吳紹聖陳國正金應宿詹大全金鳴玉徐有紱
徐邦華姚齊寶朱家元程義山吳尚彩胡奕垣王澤吳文元朱
紱程必慧吳應錫吳士連汪德輝汪居敬黃喜林皆以割股救

親聞休甯縣志

孫文鳳休甯人客於外遇盜將殺之泣曰死不足惜恨家有老
母無人供養耳盜感而釋之母病割股以進及卒廬墓三年

休甯縣志

陳光祁門諸生割股療母子尚仰諸生割股療父曾孫宗瑚割
股療母同邑增生汪有源母病扶持三年割股以進得愈祁門縣志
畢求賜婺源人畢重陽之養子後親生二子而卒求賜傭工以
養母弟已不娶而為二弟畢婚母病割股以進母卒不數月亦
以毀卒婺源縣志

汪文經婺源諸生與弟庠生文緯並孝友母病兄弟皆割股以
進得愈同邑施蛟騰詹萬桃施倬朱良楫詹揚烈吳世緒皆以

割股救親聞婺源縣志

程勳績績溪諸生父疾劇割股以進得愈同邑胡承德胡承慤

章傳槐葛恩皆以割股救親聞績溪縣志

范世錦黟縣人父病割右股進得愈母病復割左股進營糞以

卜吉凶竟不起世錦哀毀而卒黟縣志

謝文昌祁門人母病醫不效泣曰吾極知身體髮膚不敢毀傷

今無可如何矣遂割股進得愈祁門縣志

饒梁棟祁門增生母病割股以進及喪廬墓一年而卒祁門縣志

汪朝溱祁門人父卒廬墓服闋哀毀而卒同邑倪昭盛胡光灝

皆以廬墓聞祁門縣志

韓社忠黟縣人少孤性至孝家貧無恆產旬以養母每食必歌

侑之母歡笑乃已嘗埋巨甕牀下封其口若甌筒狀投錢其中

積數十年母歿出以治喪如禮既葬以哀毀卒黟縣志

余大來黟縣人父歿於外聞訃奔赴徒跣千里扶柩歸母病癰

不離左右以貢當選十年不赴黟縣志

江元標婺源人乾隆甲子大水壞廬墓母棺漂失沿河號泣至

水不可涉處迂道入山遇虎不避竟得母棺以歸婺源志

王文榮婺源諸生幼失怙恃隨伯父貿易事之如父堂兄弟皆

如同胞伯年老與從弟文燿共秉家政六世同居數百指上和

下睦人無私財婺源志

孫大楞婺源貢生年十三時父病瘡恍惚中有命其至欵求醫

者既夜行數十里得方歸後居喪廬墓哀感行人婺源志

余兆英婺源人侍父僑居山東父卒借停古寺宿柩旁三年扶

榷歸抵淮南遇風舟覆自繫於棺誓以身殉中流遇漁舟拯之

得免後援例應選以母老不赴侍養終身婺源志

程繼成休甯人生五歲父出外十餘載無音耗繼成甫冠子身

往尋三年乃遇諸六合奉以歸同族程廷誥三歲失恃育於祖

母父祖俱遠遊無蹤稍長往尋偏歷諸艱至四川榮經縣訪得

繼母及二弟而父祖俱歿不能歸櫬乃負土成墳歸侍祖母及

卒哀毀骨立休甯志

程璵休甯人季父卒撫從弟瑾成人授室同之貿易歸舟過錫

山輿墮水瑾救之璵出而瑾死璵又復入救為眾所阻乃撈屍

扶棺歸葬為之立後給重貲以養其母復自投於河而死休甯志

胡家昇績溪人兄弟友愛三世同居同邑周郁兄樓居夜不戒

於火郁赤身赴救兄得不死而郁鬚髮皆燼績溪縣志

章元績溪人少失恃採薪以養初繼母擊破其頭亮以血塗破

父問亮云跌損母後感悔績溪縣志

章國金績溪人賈於蘇忽心動馳歸父病已不可為及卒哀慟

幾絕廬墓三年同邑許良廷父卒廬墓不入內室績溪縣志

汪有祺績溪人父客死漢陽祺欲往尋祖以其少不許及長至

漢江徧訪有僧告之得負骸歸過湖口舟覆抱筭出沒於波濤

中不肯釋遇救得免同舟皆死祺獨得負骸歸葬績溪縣志

江宗寅歙縣人年七歲父患疽以口吸毒而愈歙縣志

江有容歙縣諸生隨父客鳩茲父怯渡橋必負以往返後歸應

試聞父病星夜奔回遇虎竟過又心急墜水漂流數里得不死

尋奉父歸無舟車費背負以行巡撫福慶據縣志補名按職官表不載為請

旌表建坊歙縣志

洪運錦歙縣人父病須葛獨夜入深山採之遇虎不害父歿廬

墓三年同邑吳庭昌父重華患噎思食鮑時大雪嚴寒敲層冰

入水得鮑以歸母染厲醫藥不效割股以進得差又嘗代人償

逋全其夫婦建二石橋以利行人稱貸不能償輒焚其券歙縣志

程步矩歙縣庠生早喪父哀毀骨立母疾剜臂和藥以進得愈

以子昌期

封通奉大夫翰林院侍讀學士歙縣志

汪啟淞歙縣人父病割股以進及卒痛不欲生同邑葉士文年

十二母病癱左右侍奉滌濯垢污五年不懈母歿侍父十九年

未嘗離左右其家人皆言其嘗割股奉母而士文諱之甚力歙縣志

汪本耀歙縣人隨父邦進客湖南父病割股以進得愈其後邦
進家居病篤次子本輝亦割股進得愈兄弟最友愛耀生子而
妻歿輝命其妻舍女而乳姪耀卒輝撫姪過於己子姪病篤顙
神請以子代輝後以經歷分發湖北兩署歸州知州歷任皆有
惠政

歙縣志

葉敦歙縣廩生博學多才性孝友兄以疫卒持喪悉以古禮自
律逾月母又歿伏尸痛哭晝夜不絕聲既殯繞棺痛泣閱三十

一日竟以身殉

歙縣志

程世燦歙縣人與弟世煒過箬嶺弟爲虎攫燦奪弟於虎口得
免

歙縣志

畢致壽歙縣諸生貿易揚州聞母病急歸值大雪同行者皆止
宿致壽匍匐夜上新嶺有虎踞地目光如炬致壽不顧直過其

前虎亦不之顧也到家母氣已絕致壽以口引氣得復生

歙縣志

胡如楷歙縣人五歲時父出遊十二年不歸如楷逾漢入蜀往

返萬餘里尋之不值後遇一僧於中江縣知其父在幕遂請以

歸令餞之江滸父失足墜水楷躍從之抱持以出得俱免

歙縣志

許紹修黟縣人兄紹僕客死蜀中紹修年六十餘潛然曰不及

吾身往覓兄骨不得歸矣旬資入蜀函其骨歸

黟縣志

吳立循黟縣人母疾刲股以進得愈父又病篤醫治罔效潛持

刃赴石碕山寺刺脅取肝爲僧所覺奪刀推出遂下至靈官殿

碎其瓷石香爐取鋸利者挖出肝一片歸而和藥進之父病頓

愈

歙縣志

黃山雲歙縣人父疇官四川筠連縣典史罷任貧不能歸山雲
萬里往迎侍養半載父歿扶柩攜庶母所出弟妹南還江中遇

風舟將覆撫棺痛哭風浪頓息歙縣志

曹榮字以年歙縣歲貢兄泉賈揚州以事成陝西榮星夜馳往

欲隨行兄以母老不許相與泣涕一晝夜雞鳴時官吏促行慟

幾絕自是每聞雞鳴卽泣下終其身歙縣志

胡士畿歙縣人父賈湖南久未歸士畿襆被往尋遍歷數省不

見沿途號泣夢神指示得遇舊僕始知父所乃奉以歸歙縣志

程宏玉歙縣人父常病臥鄰火延及急負父出適當火衝徒手

奮撲竟得無恙嘉慶九年

旌表建坊歙縣志

王天寶歙縣人代父遠戍山西天城衛歙縣志

施道浩婺源人母歿哀毀幾絕父年躋大耋浩定省溫清數十

年如一日兄弟三人同居無閒妻亡鰥居三十七載不再娶嘉

慶十五年

旌表建坊婺源縣志

詹勝沈婺源人年十四父歿於濟南兼程馳往憑棺擗踊哀毀

骨立扶櫬歸葬哀感途人母患目以舌舐之閱月而痊又病瘋

撫摩十四載日夕不懈及卒廬墓三年道光二年

旌表建坊婺源縣志

汪烈黟縣增生事嫡母孝友愛諸弟居親喪三年不入內室工

翰墨書法米南宮人爭寶之黟縣志

程徙南祁門諸生母疾割股以進及卒廬墓以哀毀卒同邑貢

生葉儒林割股療父母卒廬墓三年又方邦楨父病割左股母

病又割右股父年九十八扶持調護維謹父母卒皆廬墓三年

祁門縣志

謝必鳴祁門廩生母病割股療之得愈同邑鄭作耘倪國襄倪

國琳倪昭茂王兆尊周學濂程國珩李尚義胡尚謨汪福標皆

以割股救親聞祁門縣志

程汝琦祁門人方童時父病割股療之祁門縣志

張燾字乾暉祁門人嘉慶戊辰舉人年十五時嫡母病疽燾以

口吮之數月而瘳父歿二弟俱幼養而訓之皆得成立祁門縣志

邱啟立祁門人賈而知義嘗偕姪販茶湖口姪舟覆急懸重賞

救之姪以貨物盡失痛不欲生啟立遂以己茶一船盡予之祁門縣志

許元亨祁門人父目瞽日夕扶持病疽侍藥累月不解帶嘗為

堂兄置妾生子撫之成立分己產二千金與之祁門縣志

董朝絳字補廷婺源廩貢歷署涇縣銅陵教諭訓導所至士人

愛慕家居孝友事父能先意承志昆季多早歿撫姪如子教養

逾於所生故諸姪多得其力相繼入詞館以父老不復出仕杜

門侍養孺慕終身婺源縣志

鄭通授字伯卿祁門廩生居父喪三年不入內室弟客死粵東

走數千里以其柩歸養姪於家撫之如子道光元年舉孝廉方

正以知縣分發山東攝黃縣篆有清名卒於官祁門縣志

程永傳婺源人四歲時父出外不歸永傳未弱冠往尋徧歷艱

險入蜀得父墓乃扶柩歸家居事祖如事其親侍叔如侍其父

鄉里稱之道光六年以孝行

旌表

施翮婺源庠生孝事父母雙親繼卒事之如生道光六年以孝

行

旌表

舊志

張廷稿婺源人室被火家人俱逃母年九十不得出廷稿以衣浸水冒火入將溼衣蒙母頭負以出母獲全而廷稿皮肉焦爛

半月而卒

婺源縣志

汪金元婺源人室遭鄰火已負父母出復冒火入負叔祖母又出矣見叔父叔母及叔幼子不得脫與妻余氏同入竟俱焚死

合族傷之

婺源縣志

臧清傑婺源人性至孝母歿廬墓父不許及居父喪廬墓逾年以繼母病劇遂歸侍繼母又卒迺守墓六載始歸不入內不飲酒終其身同邑程成瓊齊淑詢洪世諒胡士望皆以親歿廬墓

聞縣志

齊淑珺婺源諸生母疾醫不效珺私禱神割股和藥以進得愈

同邑汪紹釗父病劇割股療之二人皆嘗出資全人夫婦者又同邑程奇煊汪士達詹兆祀宋振旬汪復榮皆以親疾割股聞至俞開文割股以啗弟行過平中事越乎常雖動於真忱而不自知殆未可為則云

婺源縣志

程德言字豈凡婺源庠生父患膈需牛乳言僅有田數畝盡賣以易牛躬自芻牧旦夕掬乳以進疾漸瘥父方冬思魚不可得言踏雪四十餘里覓畜魚家而池冰不可網言即解衣破冰入取魚歸父遂大痊

婺源縣志

詹涓婺源諸生父喪明委涓家政纖毫不自私父欲析產慮三子讀書不善治生涓即取己下二千金以益之後弟業漸落父曰果如所慮涓又益之如前終不給涓遂以己產易弟產焉

縣志

張起珪婺源人年二十從父出父失足墜水珪即躍入抱救得免宅焚不顧財物投烈燄中抱神主出命幾殆婺源縣志

王起鍾婺源人宅焚母老病臥牀起鍾從火光中負母突出室已焚死二人而母子俱幸免婺源縣志

王邦傑婺源諸生早失恃弟甫十齡邦傑攜之寢處如乳母嘗從父自金陵歸父失足落江傑即躍入抱父蕩半里許遇他舟救之得俱生婺源縣志

潘芹婺源人四歲時人與之柑不食歸遺祖母眾皆奇之父病卒於外扶櫬歸里人謂不宜入門芹慟哭不聽昇入正寢母病目障日夜舐之竟得復明婺源縣志

余一新字與堂婺源庠生仲兄病篤晝夜祈禱額為之腫室夜失火一新驚覺出房鬚髮已焦灼復冒烈燄突入母房負之出

樓隨傾倒母幸得免而一新以火氣攻心失音旋卒婺源縣志

余循遂婺源人年十三隨父賈於休父失足墜水躍入抱之山河迅速流一里許得漁人救起見者異焉母中風醫不效禱天求代竟得愈婺源縣志

以上舊志

重修安徽通志卷二百三十八
人物志
孝友
徽州府
未入流方振鑑民人仰際味俱歙縣人道光年以孝行
施用潑胡元昇俱婺源人道光年以孝行

重修安徽通志卷二百三十八

人物志

孝友

徽州府

未入流方振鑑民人仰際味俱歙縣人道光年以孝行

旌表

科鈔以

施用潑胡元昇俱婺源人道光年以孝行

旌表

科鈔

吳珍重字仲威歙縣人母疾劇將剖股謂下體也不敬遂剜臂

和藥以進閱日疾瘳又張立湘黃熙熙子庠生實聲蔣學堯鮑

大鈞鮑澄汪法槎俱剖股療母法槎又有拾金還人事

吳熊字耳山歙縣人先後剖股愈父母病及父母歿廬墓五年

重修安徽通志

卷三十三

人物志

孝友

一

徽州府

又蔣世珍割左右股療父張楚玉割臂療母楚玉病其子新有
亦割股服之愈又監生黃崇廣割股療祖母歙縣志
孫元峻字峻卿休甯人商籍庠生性孝友失愛於母母病割股
以進旋瘳又武生汪慶運字善餘兩次割股療母汪啟基胡伯
桐吳玉華俱割股療母休甯縣志
汪觀大字英言婺源人父喪日哭墓歸則改顏事母委曲如意
母歿毀瘠廬墓出入必告有蛇虎馴擾之異妻程亦孝謹以哭
姑卒家觀大命其子殯之已待於途奠畢即返墓廬時稱知禮
道光二十六年

旌表

余含章字坤三婺源監生父邁危疾割股和藥療之及歿哭喪
明百日始愈承父志捐千金修浮東大路三十里同治二年

旌表

婺源縣志

程有祉字國仁婺源人母病割股和藥以進後有祉病子光熊
亦如之又李上誥潘榮生潘茂桂李世鑑汪文熾程尙菖汪熒
監生吳濟優貢江清俱父病割股李振基李乾鋼潘大高監生
吳麟玉鎮江通判詹瀛俱母病割股胡家報嫡母及所生母病
皆割股監生汪服休割股療兄婺源縣志
金言配字南山婺源人母患噎割股以進愈後言配病子泉達
亦如之婺源縣志
詹日煒字旭初婺源人母病割股以進嘗藥嘗糞歷五年獲痊
及母歿以毀卒日煒又有贈金救溺完人骨肉事婺源縣志
俞永鍾字毓卿婺源監生母病割股不起既殯以哀毀卒婺源縣志
汪瑞謙祁門文生割股療母同時有葉嗣傲者割股療父後均

以禦寇殉難又文生汪瑞甲監生許焜民人胡永會葉本分謝
惟恭均割股療父監生鄭景裔民人許鳳翔康民標均割股療
母李大經兩次割股愈父母疾後以子錫三捐職理問

贈儒林郎

祁門縣志

胡士裕黟縣人父病篤割股以進愈又漆工黃興忠母吳病瞽

興忠焚禱割股以進母目復明

黟縣志

汪嘉化字吉光黟縣人嘗割股療母病嘉化卒樞厝黃陂坦後

火災他棺盡焚獨嘉化無恙知縣異而葬之

黟縣志

汪純粹字惇士黟縣人商籍附生割股療母病頓瘥

鹽法志

又奚元照汪學為莫廷章皆割股救父汪世文胡元啟姚元可皆割

股療母

黟縣續志

舒秉畿黟縣人父遠遊不歸秉畿年十五閒關尋訪遇於常德

哀請父歸母病目三年舐之而愈

黟縣續志

余兆福程可醕黟縣人皆少孤母病割股和羹進旋愈又江有

芳盧仁燦江肇椿汪啟金均割股療母

黟縣志

朱紘黟縣人嘗割股療母病及母逝紘絕食卒

黟縣志

汪必冠字以成吳志巒字銳山項文麟字廷恩皆黟縣人割股

療父獲痊

黟縣志

黃慶鑫黟縣人父病割股進愈後復病再割不效其妻余亦剜

肉鑿姑病

黟縣志

胡本敦績溪人少孤割股療母周濟孤寡必稱母命臨卒盡焚

其券又汪大林父病割股從九胡洪榮章洪永章句俱母病割

股獲痊章洪永又有乞糴疏河諸義行

績溪縣志

胡裕熙字少穆績溪庠生以母老罷舉母病危與弟有靈先後

割股皆弗愈所以身代母疾忽痊裕熙有靈竟卒績溪縣志

周竈慶績溪人傭工歸必懷肉哺母母寢則溫被驅蟲母病割

股以瘳績溪縣志

周圭字立廷祁門廩生割股療父疾獲愈母病風圭侍奉惟謹

撫二弟甚友愛著有箏韻詩鈔及友于歌三十首祁門縣志

汪時字淑回婺源人幼隨母採薪遇虎以身蔽母虎竟去及母

歿毀卒婺源縣志

戴長祿黟縣人三歲父死於虎長知之誓習搏虎技以報卒殺

虎祭父墓黟縣志

程懋喜字英大婺源人年十歲隨父夜出遇虎噬父懋喜抱足

哀號虎委而去守尸達旦倩人昇歸葬焉婺源縣志

鄭大福婺源人弟大祿為虎所逐福奮往救虎曳尾去之婺源縣志

俞仲喧字兼二婺源人父患癰吮之愈母病割股以進逾月亦

瘳婺源縣志

鄭廣婺源貢生母患癰日吮數次愈輸紫陽書院千六百元又

捐數百金建祠中饗堂又增生程馥林母病疽親吮其毒婺源縣志

汪廷瑜字佩珍婺源貢生母患癰吮之獲痊婺源縣志

汪孝漪歙縣人為父吮疽以孝聞程思澤遺集子炯見義行孫州同

紹鏞字儉庵居父炯喪鄰火起誓死籲天火竟息積金鉅萬疾

革遺命以予其弟時育時有僅受其半方宗誠文集

詹啟衿字亦書婺源監生母失明啟衿舌舐八年復明又有拾

遺還金之事又王人偉舐祖母目三年復明婺源縣志

曹聖禮績溪人從九品母歿廬墓三年又胡裕照亦母歿廬墓

三年績溪縣志

胡樹槐字蔭三績溪人結廬父墓側課徒著有蓼莪館詩草咸

豐十年率家丁拒賊遇害子嗣臺哀毀卒績溪縣志

黃容保績溪人居母憂五年不御酒肉甯國縣志隱逸周啟楹傳注

吳元績溪人少孤貧力作養母供甘旨勤澣濯十餘年母喪鄰

居火元扶柩號泣反風滅火既葬每夜披簑宿於墓旁績溪縣志

胡輝在黟縣人負販養母母歿廬墓三年同邑諸生程亦模居

喪守禮三年不宿於家程鵬母歿廬墓以毀卒又朱雲驥紫陽

里人奉母避賊江西出入烽火求兄柩歸葬母歿以毀卒著有

延暉閣詩集江朝宗梧村人父喪哭日夜不絕聲嘔血歿黟縣志

王嘉禮婺源人貧無廬墓資日與父母墓五年不衰後服賈起

家焚券平糶婺源縣志黃嘉旺黟縣人傭值養親父疾革籲天身代及歿廬墓三年黟縣志

志

張廣德字都塹婺源人出繼叔後生母歿廬墓三年有蛇虎馴擾之異同治八年

旌
婺源縣志

葉家淑字治純婺源人父歿廬墓三年又游青樟居父喪不飲

酒不茹葷三年婺源縣志

張臨烈字紹先休甯人母歿廬墓三年休甯縣志

康飛鳴字聲遠祁門諸生家貧孝養父母相繼歿廬墓三年子

身走關中以弟櫬歸葬祁門縣志

葉兆均休甯監生父貿未歸肩販養母年十五母卒親操畚築

以葬休甯縣志

姚國城字楚方歙縣人父客死保定府時國城九歲拾薪養母

年十八辭母北行訪得父窆所負骨歸葬母疾刲股以進旋愈

歙縣志

汪振鐸字斗墟黟縣諸生父國僕賈荆襄間轉徙入蜀十年無

黟縣志

孫枝秀字穉蘭休甯附生母程病篤禱於關聖著覺世經七言

律詩母疾遂瘳咸豐十年枝秀遇賊殉難

休甯縣志

丁雲萼黟縣附貢丁紹昌之子善篆書母病劇雲萼兄弟虔禱

文昌而愈乃篆陰騭文於石

黟縣志

程春英字韻鈴休甯人父病篤籲天請代不起以哀毀卒

休甯縣志

程士秀字實夫婺源人侯選同知七歲母病焚香私禱延母算

及歿哀毀如成人居父喪三年不入內喪繼母亦然季弟卒撫

遺孤如子又於江西輸義倉千金

婺源縣志

戴經鍍婺源人父鴻翔以孝友聞嘗病疫經鍍祈減己算未幾

卒父病瘳

婺源縣志

又貢生汪祥煖監生汪祥熱並以待疾不懈居

喪盡禮聞

婺源縣冊

張道藩婺源庠生父疾篤默禱祈代明日疾間道藩暴卒

婺源縣志

葉長青字河清黟縣武生母病風出入必隨飲食必潔侍奉十

餘年無懈又貢生汪光徽吳瑄諸生葉義暘江洪祜汪揚光府

經程士暹及吳熾昌孫遴金尙整余爲立李襄舒遵勇胡懋炳

均以久侍親疾誠奉不懈聞

黟縣志

汪承榮字殿榮黟縣諸生母病盡脹朝夕祝天親奉湯藥七年

乃愈叔伯乏嗣分己產爲之立後

黟縣志

孫百齡字征一黟縣人國子監典籍父有氣疾垂危禱天身代

果得氣疾而父痊

黟縣志

吳廷傑字仰清黟縣監生服賈養親待父病三月不解帶事嫡庶生母俱無閒言教養幼弟六人成立修橋路置義冢設義渡皆繼父志弟廷梁附貢生咸豐五年賊擾所居村廷梁先以母命率眾出禦及見火起馳回入烈燄中抱母衝出賊亦未能加

害黟縣志

江列治婺源人居室災將攜子出聞父陷往救同死之子亦及

難婺源縣志

王良裕字永年婺源人幼為世父後耕田以養本生父母鄰火延燒毀門負父母出侍疾嘗糞婺源縣志

洪鈞字梅坪婺源舉人官中書乞養回籍父立登州同銜嗜學好義鈞事之孝謹及歿廬墓三年生平以躬行實踐為學嘗求陸清獻汪烜余宗英遺書校刊行世又承父志修造賑濟或萬

金數千金見義必為年八十三卒邑人崇祀報功祠同治六年奉

旨祀鄉賢祠婺源縣志

程雲翔字軒宇黟縣人候選訓導父學植有七子雲翔受父財之一兄雲翰令西平因公負庫金卒官人又訟其仲兄越官階吏復以帑息持叔弟之子急雲翔馳西平償所負歸兄喪馳皖白仲冤策叔弟子完帑事皆得解倡追遠祀會葬族人積棺捐修試院書院義行甚多咸豐四年粵賊掠黟先是雲翔捐輸團練暨族人集防及是家財盡歎曰無復能輸官辦賊矣憤懣而卒黟縣志

舒遵煥字守芳黟縣人從九品異母兄卒盡以祖遺田付孀嫂養其二孤堯暢服賈文藻讀書皆成立遵煥卒子甫二歲二孤

歸產撫養之同邑葉國襟字惟正家貧貿易敬事寡嫂同爨而食以長子為兄後撫姪女長成出嫁又胡際瑤字美堂敬禮寡嫂鞠嫁兒女並為時所稱

黟縣志

舒遵祿字廷封黟縣人母病牀蓐扶持五載不懈母歿哀毀而卒又遵祿及朱照霽余炳堂並有贖弟歸宗事

黟縣志

汪棟字伯梁休甯府學增生母風病臥牀六年侍湯藥如一日兄弟早卒善撫孀孤子姪患痘垂危棟焚香祝天願以子代姪俄而子歿姪愈又倡捐救生船金陵同善堂救生局俱立主祀

之

休甯縣志

汪國祥字汝嘉休甯監生繼母病侍湯藥七年弟歿撫孤成立獨力葬高曾以下十餘棺年二十餘喪偶終身不再娶

婺源縣志

程良吉歙縣文生母疾革以囊金授之良吉悉公諸伯仲及兩

兄歿析資為九伯子五之仲子及己子各二焉

歙縣志

葉尚模字雪樓休甯副貢所生母早卒父憐愛之疾革予以三百金尚模受而畀其嫡長兄析箸時願得父書之半而已坐是貧甚然廉介不苟取咸豐初元舉孝廉方正不就

楊陳復撰傳

孫朝瑞休甯人監生幼孤嫂汪乳之及長事兄嫂如父母終身無違同治三年遇賊投河死奉

信祀忠義孝弟祠

休甯縣志

江馨字韶石婺源文生父金匱知縣之紀有三子長馨次碧與馨皆孝友之紀馨碧先後卒馨哭父兄甚慟至於骨立撫孤姪恩勤如己子事母尤孝咸豐間董辦團練有捍禦功加國子監典簿銜

婺源縣志

潘周南字公輔婺源人同知銜幼孤食貧養母及長貿易稍裕

與弟姪析居讓肥取瘠村有善舉輸金皆歸美於親婺源縣志

程震祥婺源人府學生異母兄病劇祈以身代歿後兄檢遺稿

始知其事又嘗拾遺百金還人婺源縣志

倪篤圭字蒼錫黟縣人兄篤璽客東陽圭亦幕游粵東忽念兄

心動辭幕歸適璽病歿無子圭傷之亦數月卒黟縣志

程鑄字右陶黟縣人事庶母盡禮庶母弟最少鑄盡以膏腴產

分弟而自取磽薄者同邑江尙櫛亦以敬事庶母聞黟縣志

程大增字廣存黟縣監生少孤貧撫諸弟成家而後娶同祖弟

遠遊無耗蹤跡以歸復不壽敬養其叔父及諸姪無缺乏焉黟縣志

志

王大成字治功黟縣人異母兄患疽日夜扶持至數十起弟有急難三時行百餘里盡力營辦得解同邑王元永字賡堯其家

甚貧有弟六人皆元永節縮衣食教養成家四弟客皖北病危

元永徒步數百里襁負而歸黟縣志

汪鼎銘字敬廷黟縣廩生汪文灝之子與弟良玉並為賊掠索

贖金畱良玉為質鼎銘奔回措如數或危其行泣曰不去弟休

矣徑往贖回黟縣志

程慶治字尹耕黟縣監生鹽經歷同懷八人慶治出嗣伯父盡

以所後產均分七弟獨力葬祖父母嗣父母本生父母又從九

程崇禮字履中父歿盡推遺資與諸弟而自食其力監生俞正

馥字見初屢以己資彌兄弟闕乏上事老母下植諸姪并修宗

祠黃美輅黃瀾汪光彥並資給兄弟不倦黟縣志

程握蘭字循陔黟縣廩貢太平府學訓導少喪母善養父志承

歡繼母友愛幼弟終身不忍析產子軍功五品監生程恩煦字

郎仁承受祖業十取其一又獨力葬祖父母父母諸叔父母之

柩妻葉亦賢出簪珥以畢葬事諸兄弟相次歿撫諸孤如己出

恩煦子朝鈺字伯堅諸生母歿哀毀父慰之杖而後起黟縣志

俞政敷婺源人父病寢不解帶五年硯田所入分給兄弟婺源志

胡培孝績溪文生父秉虔任丹噶爾同知卒官培孝即日一慟

而死績溪縣志

張傳書字守丹績溪增生居父喪哀毀而卒又唐獻皋洪嘉紀

周錫岐汪為河汪鏡清胡端衷章元照章天賜章華國並以善

居喪聞績溪縣志

潘觀光字汝嘉婺源監生母歿哀慟嘔血卒生平好善歲饑貸

資平糶三次婺源縣志

金文藻婺源人幼喪母哀毀如成人父歿亦如之及繼母歿哀

慟旬日卒又王春錦父歿哀毀卒婺源縣志

汪芳浩字仰賢休甯人父又祁陷冤獄偕兄芳澍控理未伸父

竟以刑死芳浩泣血叩

聞得雪奉

言歸葬休甯縣志

朱承淇字瞻菴休甯人母愛潔衣必臨河自浣承淇輒隨之會

清明拜墓未歸母濯衣墮水死承淇隨即自沈時娶妻纔四十

日休甯縣志

程啟誥字邾芳婺源監生自粵徒步奔父喪抱棺號泣而歿道

光十三年

旌表婺源縣志

胡根禧歙縣人賊至守母墓不去被害歙縣志

汪德椿歙縣人營葬祖母遇賊欲劈其棺德椿死拒不獲遂投水賊去遇救葬畢服毒死歙縣志

朱咸泰休甯人議敘八品賊至守母喪不去被害又朱復泰同妻吳氏堅守母喪均死之休甯縣志

江慶福字受其黟縣人咸豐間粵賊竄黟野掠至所居慶福與弟慶社侍母病不去皆遇害黟縣志

吳龍富婺源人賊至侍祖母病不去被擄不屈死婺源縣志

施文鏞婺源附貢母歿未葬會賊至撫棺不去卒無恙又嘗修路濟貧費千餘金婺源縣志

黃裳休甯人從九銜年七十負母避亂遇賊將殺母裳哀號請代並免休甯縣志

朱聖志婺源人負母避賊追騎至哀號求免賊感而舍之婺源縣志

江朝宗字毓山黟縣附生母病牀蓐朝宗負走以避賊忽與賊遇大呼曰無傷我母願以身代賊兩釋之又太常博士黃士鑑負老母夜走避寇得免黟縣志

王康泰字階平黟縣諸生負母避賊出走為賊所劫欲殺母康泰泣請代死其母亦求殺己以免泰賊並釋之黟縣志

程敦璽休甯人父遇賊願身代賊感而並釋之逾年獨遇賊不屈死又汪文澄程應煊見父被執一乞代一力救俱遇害姚夏王洪汪庭芳朱仁檀並休甯人均以母被賊害憤鬪死又吳開泰勸母被害自經妻許自沈休甯縣志

汪嗣澧汪嗣沅休甯人兄弟學生甫十歲見母吳伯母朱遇賊殉難均號哭不食死休甯縣志

程仁欵縣增生嘗同汪熙禦賊府城陷奉母入山糧絕出負米

聞母被害奔歸悲慟不食死歙縣志

章榮祥歙縣人父被賊執祥請代許之及父去遠罵賊死歙縣志

俞允貞婺源人賊執其父貞請代行父得釋允貞被殺婺源縣志

周光祺字麟君績溪庠生負母避亂賊刺其母光祺以身蔽之

遇害績溪縣志

洪玉同歙縣人年九歲父被賊殺玉同號泣罵賊死又胡慶瑞

江正泰吳呈祥均以父死於賊奔救被害歙縣志

朱德隆休甯人遇賊護母身受七創死又陳長林運糧供母遇

害休甯縣志

趙秦鏘休甯人賊至父逃鏘奉母避山中旋出尋父遇害又汪

文昇見父被殺毆賊死之休甯縣志

汪長敘婺源人隨父客武昌城陷賊殺其父奔救死之又張聯

發董緒綸葉盛高均救父殉難婺源縣志

詹銓貴婺源人負母避難賊將追及囑其弟護母速行己與賊

鬪死母賴以免又張塾秀王培俊王培生王發祥董迪鈞董乞

仁均以護母被害婺源縣志

金漢森婺源人傭工在外聞城陷號泣尋母遇害婺源縣志

饒際榮祁門附生父被賊執救父罵賊同時被害又王芬林鄔

靠天葉嗣棟並以救父殉難文生汪景受以負母避賊遇害祁門縣志

舒可文字彩芬績溪人僑居歙縣楊村寇警自成一隊保石砦

斃賊頗多後大雨賊忽廕至文負母奔避同時遇害績溪縣志

胡嗣遠績溪人幼受經書於母未嘗從師後負母避難賊追及

衛母被害又章誠負父遇賊被害績溪縣志

汪彬字守均績溪廩生父為烈死於賊彬以身衛之同遇害又
吳承焯歙縣人年十二祖母遇賊投水承焯號泣抱尸以殉歙縣志

胡有如績溪人寄居歙縣年十四祖被賊殺憤泣罵賊死之歙縣志

朱世康休甯人從九街少孤服賈以母病歸賊至侍疾不避受
敵炙將死謂母曰勿急埋兒魂當在母側遂停屍破屋中後賊
屢至母走避屍所輒免休甯縣志

程啟治休甯人兄啟煥啟泰拒賊力竭治奮勇往救同時殉難
休甯縣志

程立義歙縣庠生兄鼇與賊目鬪死立義懷刃伺賊賊刺之遇
害又程基徽吳天福俱以兄死於賊殉難方宗棠以弟被賊執

力鬪死之歙縣志

左和上黟縣人憨慙不自知其年傭值事瞽父終身不娶謂有
妻子則多費恐闕甘旨也父年八十餘乃終負土營葬歲時號

慟尋卒黟縣志

汪湛恩績溪增生與弟監生為筠篤友愛咸豐間為筠被賊擄
乘間投水死湛恩聞之泣曰吾且覓弟骸骨而後死耳不數日
人見湛恩屍浮溪旁先是為筠長子鑾因母病侍養未肯去賊
至脅鑾不從殺之兩江忠義錄

胡端衷字玉香績溪人幼失父奉母至孝母歿廬墓三年咸豐
十年殉難兩江忠義錄

汪道鴻績溪增生父振甲年八十三臥病道鴻侍疾不去闔門
殉難又鄭灶林負母避難遇害章忠祥字繼發隨父炳輝入陣

救父力戰殺賊而死

庚申忠義錄 績溪縣志

周鐘錡字杏莊績溪人好學工詩父錫遐遇賊將死鐘錡以身

代俱免既而同絕粒死

績溪縣志

章定順績溪人慟母遇害與賊鬪死

績溪縣志

胡大餘績溪人賊至母老不能行大餘與妻張氏及子女咸圍

守不去俱被害又胡嗣福亦以護母被害母獲免

兩江忠義錄

方梓萱歙縣人咸豐十年鄉團堵賊杉樹嶺梓萱奮往殺數人

賊擾其村復扼險拒之十一年待母於鴨頭遇數賊護母力鬪

被創死母乘間得脫

兩江忠義錄

余啟鉉婺源人奉

旨建孝子坊

婺源縣志

李承超婺源廩生同治十二年

旌表孝子

婺源縣志

重修安徽通志卷一百二十九

人物志

孝友 六

甯國府

晉何琦字萬倫司空充從兄其先自潯遷居陽穀年十四喪父
哀毀過禮察孝廉除郎中選補涇縣令丁母憂泣血杖而後起
柩在殯鄰火驟發撫棺號哭風止火息初仕以養母至是服闋
陸玩桓溫交辟並不就簡文召為參軍辭以疾溫嘗登北山歎
曰此山南有人真知足者著三國評論凡所撰錄百餘篇年八

十二卒 晉書本傳

唐蘇仲芳南陵人太和中父死負土成墳廬於墓側遠墳行哭

羣鳥隨之悲鳴 統志唐書孝友傳敘

萬晏涇縣人以孝弟稱數世同居詔表門賜束帛有司歲時存

問并復其家唐書孝友傳敘

楊懷旌德人光化中試太子校書行誼修飭自唐太和初至宋

乾道間數世同居累千餘口以孝友世其家一統志

趙德儼太平人數世同居旌表門閭賜粟帛歲時存問復其賦

稅唐書孝友傳敘

宋許遂字伯通規之子也規嘗羈旅宣歙故遂居宣城早孤事

母盡孝鄉人勵其子曰汝獨不慚許伯通乎子命字堯言幼失

恃父所嗜味遠邇畢至隨侍都下與妻子共食粗糲而奉饌頗

珍公卿多推俸佐之居喪以禮聞通志

包整號南堂居士涇縣人孝友嗜學訓子方嚴貯書為萬卷堂

子三人泰明泰亨泰有兄弟子姪聚居八十餘年有靈芝產其

舍舍人王芾名之曰芝堂甯國府志

汪文諒字叔達旌德人與兄文政俱尚義輕財累世同居凡一

千三百口天禧中旌表其門後以方物獻詔賜白金文諒請以

賜金易國子監書歸訓子孫詔從之萬姓統譜

周廷堅涇縣人二親早喪二弟廷翼廷揚俱幼廷堅教育備至

友愛聞於鄉里所居有棣花閣太守陳騏名曰和睦之家甯國府志

李經字天常南陵人母卒廬墓躬執畚鍤壘垣植松地故多虎

後遂絕跡一統志

汪政宣州人累世聚居詔加旌表蠲其課調宋史表承詢傳

呂鏜字夢祥旌德人幼孤事母以孝聞嘗游宿毫閒客潘氏不

御酒肉問之答曰鏜遠游親養不給敢自享厚饌乎政和三年

入京上書請嚴生子不舉之禁仕至鳳翔府判官時人為之著

實德傳卓行錄其名甚顯萬姓統譜江南通志

俞極字伯高宣州人聚族千指家法肅然同居者累世乾道中

以狀聞詔表其門并復其家江南通志甯國府志

何自興甯國人父疾禱於神割股以進三日而愈縣令余燦為

作孝行歌以訓邑眾江南通志

郭宏賓旌德人原名天鐸隆興進士聞父喪徒步奔歸廬墓三

年甯國府志

元周涓卿甯國人親歿於墓側築永思亭哀慕歷九年不改江南通志

通志

明凌餘慶宣城人洪武初以匠役京師聞母病顛天割股時禁

嚴不得輒歸白於官以聞敕以所割股付餘慶妻兄楊添一持

歸妻和糜進其母尋愈詔復役旌其門萬姓統譜

楊慧宣城人有至性里人余慶童與慧父雲中表慶童以罪亡

命雲匿之事覺連坐慧挺身代父行父不忍號泣固請乃哭而

送之中途為邏卒所苦天忽震電卒懼不敢動比入都怡然就

繫尋赦歸甯國府志

張道榮旌德人事親篤孝父患痢母傷跌皆躬自抱持親為滌

穢及卒結廬墓側守之三年正德中旌江南通志旌德縣志

戴三元旌德人父品以黃册事逮赴詔獄三元與兄隨至京鞠

問當刑兄弟爭代卒以三元代父死江南通志

江休旌德人永樂初父坐事赴刑部臨刑屬諸子以後事休泣

請代父不肯休竟詣所司訟其事得釋父嘉其孝厚予之資休

曰此人子分內事豈可因為利辭不受江南通志

周伯諒旌德人母病痼數年躬自澣濯不懈甯國府志

梅應魁宣城諸生父病篤禱於神願捐己算以益父比卒哀毀

如禮既葬廬墓蔬食水飲三年始歸江南通志

吳大經宣城人父宗周宦臨江繼母金氏偕往大經在家忽心

動犯江濤以行適金病亟侍藥送死宗周病癱吮膿嘗糞居喪

骨立旌祀孝子祠江南通志宣城縣志按明史稿孝義傳

志俱不載如為大經父傳中亦宜

陳希良字克宗宣城庠生母病衣不解帶者累月及殯廬於墓

朝夕哭奠父歿亦如之江南通志

俞瓏字汝霖宣城人幼失怙母病篤顛天刲股得愈母終廬墓

三年詔給冠帶旌之江南通志

朱時俊宣城人父夢桂病死數日後痛不忍蓋棺顛神求代父

果甦已患癱痿俊刲股和丸進之復起江南通志

費有時字子雨宣城諸生孩年母病輒泣不食父好客而家貧必多方召客為歡母卒廬墓弟性流蕩有時以母命終身不析

箸江南通志

徐棠字友之宣城人母病刲股顛天果得異人授藥而愈居喪

廬墓未嘗見齒歷任婺源尉氏學博所得祿悉散宗親江南通志

陸可宗字省我宣城諸生父病篤刲股以進獲甦同邑汪昌字

大旌母喪廬墓三年歲饑遺齒徧路撤樓板為棺瘞之正德中

以貢授進賢主簿江南通志

孫國訓宣城人母卒廬墓三年虎踞其前略不為動江南通志

吳日通宣城人與弟日遇同居六十年不忍折箸人稱二難江南通志

通志

潘甯海宣城人六歲時父客外音問久絕甯海圖父像號泣中

野後獲父柩於淮邳千里裹骨歸母患膈割股以救江南通志
張昭南陵人年十四父邁危疾割股和糜以進獲愈及卒哀毀
骨立喪葬以禮

國朝雍正八年

旌表建坊江南通志 甯國府志

吳珍南陵人性友愛弟疾篤告天求代不數日弟愈珍以疾歿
其弟撫其七子勝於己出江南通志

沈仲煜南陵人弱冠時母歿守棺不入私室比葬廬墓側朝夕
哭泣父憐而召之不歸以疾卒遺孤甫歲妻詹氏守節撫之成
立人稱一門節孝江南通志 甯國府志

劉邦正南陵人年十六父病篤割股和藥父夏月思蠲邦正號
泣水濱得二蠲疾愈每朔望告天願減己算益父果仆地死御

史宋堯聞而祭其墓江南通志

丁楨南陵人兄子涿論死繫獄楨恐兄絕嗣請於官願代涿死
獄成知縣胡文靜察其枉白而釋之江南通志

何正人南陵人七歲時母病浮腫正人以手按之而泣母喪臥
尸側諸母泣勸之乃起父卒廬墓三年事聞給冠帶旌之江南通志
方必通太平人年十五父病割股以進得愈及卒廬墓三年祀

郡孝子祠江南通志
陳曾太平人家貧傭工養親父母病皆糜股以進及卒先後廬

墓六年甯國府志
李宛仙太平庠生居喪哀毀廬墓三年甯國府志

沈壽隆宣城人生而孝友析產惟嫡母命兼聽兄便家遭盜壽
隆衛母受傷仆地母得無恙領天啟丁卯鄉薦崇禎丙子舉賢

良方正不仕甯國府志

曹七善南陵諸生事父孝嘗於姑蘇旅邸獲徽商所遺八百金留五日候其人還之歲饑輸粟五百石助賑

國朝乾隆九年以孝行

旌表建坊江南通志甯國府志

孫懋藩宣城人親疾刲股療之歲歉出穀賑饑道殣者瘞以糶

鄉人德之甯國府志

邵樸元太平人萬歷戊午舉人事親孝時詔求異才當道交薦樸元以親老力辭不就嘗買婢泣不已詢之知有夫且有孩未

離乳即呼其夫至以券還之後主教白鹿洞書院甯國府志

宗樂宣城人事繼母孝友愛諸弟內外無閒言事聞授冠帶旌之同邑錢大用孝事孀母四十餘年負米承歡如一日甯國府志

嚴大本南陵人刲股療母居喪廬墓三年江南通志

朱慶福涇縣人年十六嫡母蕭氏病篤慶福貧甚不能具湯藥即刲臂作糜進之而愈江南通志

洪希泌涇縣人一歲而孤為伯所撫伯病劇刲股和藥伯卒廬墓三年江南通志

趙桂枝涇縣人年十三游兵執其父露刃索金桂枝出叢薄間抱父兵以刃揮之號泣不忍釋俱被害江南通志

何炳南陵諸生盜執其父欲殺之炳挺身出救遇害父得脫江南通志

汪文英甯國人五歲失恃哀毀如成人敬事繼母徐氏兄文光歿鞠育二孤逾於己子江南通志

林桂芳太平人父倬卒於官千里扶柩歸賊劫其母桂芳翼之

重刊安海通志 卷之二十九
被創死母得免

江南通志

張廷翰旌德人幼失怙七歲授小學至雞初鳴衣服至寢門問安問於師曰此可行於今否師曰何為不可即每日雞鳴盥漱衣冠候母聞鼙聲輒欣然去或母微病不食翰亦不食母歿四時薦食如生

江南通志

江景宗旌德人力耕養親父病危號天請代父卒廬墓三年天

啟中以孝旌

明史孝義傳敘 江南通志 甯國府志

呂賜宗旌德人母病刲股療之兄皋宗無嗣撫遺女若己出歲饑傾資賑粥數月又嘗塗拾百金候其人還之

江南通志

鮑邦志旌德人母病劇持刀抉胷取肝食母立愈崇禎初詔賜冠帶郡守為建孝子祠

江南通志

林文榜太平人萬厯間大水父被溺從樓墜下援之與父俱殞

江南通志

孫世賢太平人父客死燕邸徒跣扶輓歸距家半里無廬可倚晝夜抱棺呼搶族人為葺數椽虎豹其側不色動廬傍忽涌甘泉既三載咸勸歸泣曰禮未葬不變服吾何歸乎及葬始除服

江南通志

焦天燭太平人甫八歲刲股愈父病母疾亦如之客涪安於張公祠得遺金一囊會遺金者與逆旅主人爭鬩來誓於神詢而還之其人分謝不肯受因勒碑祠內以彰其美

甯國府志

貢汝悌宣城人父病嘗穢及卒廬墓三年

江南通志

戚學傳宣城人事孀母能怡顏承志母病嘗穢求醫祝天請代母絕復生事聞給冠帶旌其門

甯國府志

蔡欽宣城庠生父喪廬墓哀毀成疾

宣城縣志

曹鐸南陵庠生父歿廬墓有碧雞黑虎之祥

國朝乾隆九年

旌表建坊

甯國府志

周儀字宗式南陵人正德庚午舉人父母既葬廬墓三年後宰

宣平有廉愛聲

南陵縣志

夏守烜南陵人母病顛天求代及卒哭殞苦次後葬母於蕪邑

廬墓三年同邑汪元祖亦以親喪廬墓聞

甯國府志

黃思齊南陵人父為仇所誣陷思齊徒步追隨年甫十三齧指

血上書控父冤竟得平反父卒廬墓三年仇亦為之感化

甯國府志

徐賢字思聖涇縣人宏治壬子舉人母疾焚香告天請以身代

母竟得痊後就教職即以養母乞歸母年九十九卒卒之日賢

一慟而卒

甯國府志

趙寵涇縣歲貢父昌為布政使卒於官迎櫬入門俗信巫覡沮

之寵哭爭如禮事母朝夕侍側不忍離竟不就官而卒

甯國府志

王鏞涇縣人知府達之子嘗侍父北上遇盜以身蔽父願代賊

釋之

甯國府志

徐士傑涇縣人母疾危刲左股以進病得愈父卒廬墓終制同

邑沈萬宰父暴疾嘗穢知其苦以告醫者父病得痊及父母繼

卒咸廬墓三年事聞並得旌

甯國府志

程榮涇縣人御史富兄父疾劇醫云須得陰陽血和丸服榮與

妻凌氏夜焚香告天各取股血以進果得愈

甯國府志

查本固涇縣人親喪廬墓三年妻李氏事姑孝養備至亦賢婦

也本固為郡縣所欽舉鄉飲授冠帶

涇縣志

翟質涇縣人母病經年不解帶刲股療治不令妻孥知之同邑

汪廷杲以樵採供母年十三母病刲股以進及卒殯送如禮又

王守恭年十二刲股以愈母疾甯國府志

趙夢麟涇縣諸生嘗刲股療祖疾萬厯時歲饑為父士禮輸穀

二千石以賑事聞得旌甯國府志

陳伯和涇縣人父年已八十患喘疾伯和刲左脇出肝熟而進

之病竟愈知縣李鸞勒石誌其事甯國府志

查溥清涇縣人母歿廬墓事繼母撫庶弟人無閒言涇縣志

洪一麒涇縣人幼失母事繼母如母弟一麟早卒撫其三子如

己出子苞字儀士麒病篤苞剜股和丸以進得愈里人為之語

曰孝子之後常生孝子前有聖瑞後有儀士涇縣志

陳大任南陵人母病刲股以進及卒事繼母念母吞聲飲泣致

病幾絕有道士以丸投口中大呼曰汝忘汝父耶遂蘇甯國府志

屠義民甯國廩生母卒哀毀廬墓三年不離苦塊子元諧亦廩

生事母盡孝居喪廬於墓側兄元誠病篤躬視湯藥甯國府志

黃一榮甯國人父母病劇刲肝療之及卒哀毀廬墓甯國府志

何應元甯國人母歿廬墓極終身哀慕之誠後以貢就教職升

蜀令有清名甯國府志

劉邦基甯國諸生母亡廬墓三年甲申後復依墓側三年後竟

不知所終同邑章之煥候選主簿母歿廬墓事之如生甯國府志

呂文奎旌德人母病劇禱神請以身代而愈及親故廬墓三年

同邑張廷旭父母病皆泣禱以身代及歿廬墓三年甯國府志

張昌旌德人父病取糞嘗之以告醫而疾愈甯國府志

江壽蔭旌德人母邁厲幾死朝夕調護目不交睫哀禱於神請

以身代母愈而壽蔭竟死甯國府志

江添宗旌德人父傳官河南洧川教諭有疾添宗在家心動即東裝千里奔省本繼伯父後貲產頗饒並以均諸昆弟不自私父欲治家廟與家塾起義冢皆能力繼厥事甯國府志

汪若校旌德庠生母病刲股以進得愈同邑王廷聰官廣陵驛丞父病刲股以進同官為申詳本府以表揚之又劉大瑄王賢生姚懋功方昂善姚祥應湯希孝皆以刲股聞旌德縣志

呂崙慶旌德人母病痢不能起崙慶以手承之久而不厭竟得愈同邑呂茂蔭父病革異母弟甫三歲父屬善視之及父卒友愛倍至既長取父遺產分之毫無所私甯國府志

姚偉昌旌德人母歿廬墓與弟不析爨同邑饒遂興一家百口同爨無勃谿卒年九十九甯國府志
皇甫應興旌德人甫九齡父病篤請以身代尋愈友愛二弟濟

困恤貧閭里親之同邑江廷模父母病顛天請代藥必親嘗及卒哀毀廬墓終喪甯國府志

劉光煥旌德諸生母病嘗藥朝暮禱代尋愈體先志置田四十畝以資族之讀書者甯國府志

李廷材太平庠生與兄廷相弟廷桂五世同爨累百餘口家政肅然甯國府志

焦守敕太平人性至孝父老不堪粗糲救為備保得錢即市酒肉以供父有所嗜必力致之病視湯藥朝夕不離卧所甯國府志

呂元良旌德人父歿哀毀骨立及母終亦如之不入寢者三年又置釣鰲書屋以課士捐義田數十畝以濟窮乏

旌表建坊旌德縣志

重修安海縣志

卷三十一 人物志

孝友

甯國府

王興宗太平人生數歲父往遼東久不歸興宗年未弱冠獨往

尋之數年徧歷崎嶇不得傍徨欲死忽遇一老人詢問因告之

曰汝父歿已久矣曾遺一齒於余家遂奉以歸招魂葬之太平縣志

孫時潤太平庠生母喪廬墓三年太平縣志

焦文治太平人少失父貧甚冬月解衣以煖母母憐之輒自用

力使汗出以示無寒意母病禱神並父墓得愈人以爲誠格天

啟元年旌太平縣志

杜克容太平人少孤事母最謹母病刲股以進得愈及卒終喪

不入內寢太平縣志

王大黑太平人甫總角能文母病篤大黑悲慘自爲文禱神祈

代是日便卒而母得愈太平縣志

梅士學宣城人萬曆舉人事父孝謹奉嫡母能得其歡心鄉居

不履城市人稱真孝廉江南通志

劉芳顯字孔昭宣城人性孝友貧甚游於京師名籍甚歸罄所

得營葬祖父母爲諸弟完婚并爲從弟完婚以承叔祀江南通志

杜三陽太平人爲父母及兄刲股者四遺產悉讓其兄宗人有

遺糧者爲破產償之江南通志

左鐵涇縣人弟早卒遺一幼姪有以人命誣其姪者鐵匿姪挺

身任之數被拷掠人或勸之鐵曰吾有子弟止一孤我死代姪

可也鐵死而事白姪得免江南通志

梅有振宣城人母病瘵負而卧起者十餘年兄歿撫遺孤如己

出平生焚券濟困諸事不勝紀江南通志

孫顯道宣城人兄弟四人已析箸以季負糧繫官破產贖之乃

復合食歷三世無敢言析者江南通志

黃石宣城庠生母病數年石親扶卧起侍藥拭穢其大母病亦數年石事之如所以侍母者採施閩章所作墓志

姚汝弼宣城諸生性孝庭有杏母所手植母卒汝弼每攀樹號

泣顏其堂曰存杏子嘉藻母老目盲日夜扶持兄病痢手奉溲

器者月餘兄卒撫姪如子與弟嘉穀友愛不析居後穀領鄉薦

知武岡州有廉聲升真定同知歸建義學義倉甯國府志

王朝諍宣城人繼母病刲股以進得愈年三十妻亡朝諍感其

善事舅姑不復娶甯國府志

程一仁太平人九歲母病刲股以進得愈及卒廬墓三年甯國府志

黃旺太平人黃兆麟之養子邑鏡嶺多以匪竊為業巨奸黃永

壽為首惡獨麟不附壽銜之一日醉而辱麟相角致斃旺歸自

田曰父老弟幼願身任之奔縣自首百拷不易獄具引領就刃

屍歸弔祭者七十里為立祠甯國府志

黃學易甯國庠生父病刲股以進得愈及卒廬墓三年同邑庠

生凌美亦以刲股廬墓聞又許良弼亦庠生母喪廬墓嘗拾遺

金守而還之甯國府志

成蛟涇縣庠生明末兄虬游宦客死兵亂道梗蛟備歷艱險入

閩扶櫬挈孤寡以歸甯國府志

